

Guangjshih Minzczuz Bau

ganhau: CN45-0036 B.2017 Nd.7 Ng.5 liggaeuq dingyoux nienz ndwenroek cibngeih

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3281期

Yungzsuij Cuknet Swnjcienz Caeuq Hwngfat Conzdungj Vwnzva Maenhndei Minzczuz Siujsoq

融水夯实传承和发展少数民族优秀传统文化

Gaenh bi neix daeuj, Yungzsuij Myauzczuz Swciyen Minzczunghgiz haenqrengz swnjcienz caeuq hwngfat conzdungj vwnzva maenhndei minzczuz siujsoq, cingzcik yienhda.

It dwg yungh mbanj daegsaek minzczuz siujsoq guh caidij, bang doi swnjcienz hwngfat minzczuz vwnzva maenhndei. Gaenh bi neix daeuj, bued roengz ngaenzcienz cienhangh hwngfat minzczuz siujsoq, dajcauh baenz Yanghfwnj Yangh Yijbuz Cunh; Swyungz Yangh Dunghdenz Cunh Mbanjdenzdouz Mbanjmyauz, Mbanjsiujdunghgyangh; Anhdai Yangh Beizsiu Cunh, Yenzbauj Cunh daengj mbanj daegsaek minzczuz siujsoq guh daiqbiuj haenx, hwngfat le bued conzdungj dinfwngz minzczuz, gijgwn minzczuz daengj daegsaek canjniel he, swnjcienz caeuq baujhoh conzdungj vwnzva minzczuz siujsoq

doengzseiz, coicaenh vunzlai gungzhoh minzczuz siujsoq dangdieg demsou baenz miz.

Ngeih dwg yungh ngoenzcienz angqhoh hozdung minzczuz siujsoq guh cindi, langhbaij caeuq cienz minzczuz vwnzva maenhndei. Dajcauh baenz "ndwencieng Myauzczuz baenzdauq ciet bohoh", ndwenseiq cobet Myauzczuz, ciet aenvenz max doxdik daengj bued ngoenzcienz minzczuz binjbaiz he, rengzrdw senhconz caeuq langhbaij le conzdungj vwnzva maenhndei minzczuz siujsoq Yungzsuij, mizyauq haifat caeuq hwngfat le ngoenzcienz minzczuz lijyouz, mboujduenh doidoengh hwngfat minzczuz doxgiet cinbu saehnieb caeuq ginghci gwnzbiengz gak hangh saehnieb.

Sam dwg yungh minzczuz vwnzva hauej hagdangz guh diemjcaphauej, gungganq swnjcienz caeuq fatyienz

minzczuz conzdungj vwnzva maenhndei. Hopheux minzczuz vwnzva maenhndei daegdiemj, yungh hagdangz guh cawjdaez, haiguh gofoux minzczuz, fwen minzczuz, diyzuz minzczuz daengj sonhag hozdung caeuq saedhengz hozdung.

Seiq dwg yungh bujcaz sawgaeuq minzczuz guh fwngzgaem, doidoengh gohyoz yenzgiu caeuq yungh gij cingzgoj sawgaeuq minzczuz. Cienzmienh haiguh hong bujcaz sawgaeuq minzczuz siujsoq daengx si, dawz Anhdai Yangh guh sawqdiemj bujcaz sawgaeuq minzczuz ndaw yienh, gyau 50 lai diuz bujcaz diuzmoeg, sawgaeuq vwnzyen swliu cungjsoq daengz 690 lai cek, cungfaen fatok gij cozyung sawgaeuq minzczuz siujsoq doiq hwngfat minzczuz vwnzva haenx.

(Cinz Cunghdwz Veiz Yungzcunh)



Ndwenroek Coroek Cietnauhbya

六月六 闹鱼节

6 nyied 29 hauh(liggaeuq ndwenroek coroek), Liujcouh Si Yungzanh Yen Cangzanh Cin Mbanjdabauz Mbanjmyauz banh ndwenroek coroek "cietnauhbya" hozdung, dangdieg beixnuengx Myauzczuz caeuq Bouxcuengh, Dungcu daengj doxcomz boq aenvenz, diuq fouxcaijdangz, youq gyang raemx nauh bya, gaeb bya daengj hozdung, angqhoh fungsou. Ciuq cam rox, liggaeuq ndwenroek coroek "cietnauhbya" dwg ngoenzcienz conzdungj beixnuengx Myauzczuz muengh fungsou. Ndaw doz dwg gyoengq hekyouz youq gyang raemx gaeb bya.

(Danz Gaijhingh/谭凯兴)

Vanzgyangh Haenqrengz Vatacmh Gojgaeq Ndawbiengz Louzce Gij Yaenqsiengq Mbanjbya Mauznanz

环江大力挖掘民间故事留住毛南山乡记忆

Vih swnjcienz, vatacmh minzczuz vwnzva maenhndei, Vanzgyangh Mauznanzczuz Swciyen Minzczunghgiz daj bi 2016 ndwen 1 hainduj, cujciz mizgven vunz, cienzmienh soucomz gojgaeq ndawbiengz Mauznanz Vanzgyangh. Ndaej daengz bouxmizsim gak gyaiq, bouxswnjcienz gojgaeq ndawbiengz caeuq lauxhangz minzsuz gaenxmaenx boiqhab, daengz bineix ndwen 5 daej, gungu soucomz faenzbonj gojgaeq ndawbiengz 26 bien, daih'iek 4 fanh cih saw.

Mauznanzczuz dwg aen minzczuz vunz haemq noix he, cijmiz vah minzczuz bonjfaenh, mbouj miz saw minzczuz

bonjfaenh. Mwh nienzdaih caengz cienzdoh saw, gojgaeq ndawbiengz rapdawz gij ciznwnz gungganq ciuhvunz gvanhnen, daudwz gvanhnen, lijlun gvanhnen, hix dwg swnjcienz minzczuz vwnzva caidij youqgaenj ndawde cungj he. Gij gojgaeq ndawbiengz soucomz ndaiej haenx dwg cienz naengzliengh ndei, miz gij goengnaengz son'gyauq ndawbiengz haemq ak, lumjbaenz gyaepgouz roenrongh cingqheiq, fatyienz mbaet gwn guenjranz, iuheuh aeueiq bouxgeq gyaenz lwgnyez, danqhaenh ndiepcingz gyaundeidei...Gojgaeq hamz miz

beksingq Mauznanzczuz muengh gvaq saedceij ndei, muengh daengzcog ndei. Doenggvaq bien comz gojgaeq ndawbiengz, ndaiej hawj bouxcoz ciuhvunz geiq ndaiej yaenqsiengq mbanjranz, mboujduenh gyaak nyinhdoengz minzczuz bonjfaenh caeuq roxnyinh minzczuz miznaj.

Ciuq cam rox, doenggvaq bingzsaemj le, yamqlaeng yaek cingj lauxhangz minzsuz daeuj coihgaij, daezlienh caeuq cingjeix gojgaeq neiyungz engq ciengzsaek bae, bien 《Comz Gojgaeq Ndawbiengz Mauznanz》caemhcai okbanj fathengz.

(Luz Veijyiz)

SIUSIK DINJ

简讯

● 6 nyied 28 hauh banhaet, Dwzbauj Yen youq Cuzyungz Cin Nazlieng Cunh Mbanjnazleiz banh aen yizsi hawj baiz ancoh "aenmbanj daegsaek minzczuz siujsoq Cungguek", Mbanjnazleiz ndaiej Guekgya Minzveij ancoh venjbaiz, yaek caenh'itbough daezswng gij binjcaet caeuq mingzdaez aenmbanj daegsaek minzczuz siujsoq Dwzbauj Yen, doiq doidoengh hong baujhoh caeuq hwngfat aenmbanj daegsaek minzczuz siujsoq daengx yienh miz gij cozyung doidoengh guhyiengh youqgaenj.

(Nungz Yungjfang)

● Bi 2017 doxdaeuj, Gunghcwngz Yauzczuz Swciyen haenqrengz hwngfat ywdoj, Ywyauz, cauxlaeb "aen yienh mbouj miz bingh'aizcwng" daengj cangqheiq canjniel hanghmoeg, bouxguhnaz dangdieg ndaiej daengz cwngfuj sonyinx ndaem gak cungj ywdoj. Bouxguhnaz Gizsanh Cunh Gyahveii Cin aen yienh neix hengz gonq sawq gonq, guh yiengngaih cimgiuj oenq, caz mbawngaih daengj doxgaiq ciengxdang, gujsuenq bi canjliengh 300 dun, canjciz 500 fanh maenz, daiqdoengh bouxguhnaz laisou baenz miz.

(Cwng Ciminj)

● 6 nyied 28 hauh, aen yizsi hainduj bi 2017 vangjdoxlienz + ciet makgaivaiz Baksak youz Baksak Si Yinzminz Cwngfuj, Ahlijbahbah Cizdonz, Gingham Cizdonz, Suhningz Yinzsangan Cizdonz doengzcaez cawjbanh haenx youq Baksak Yenzbozyenz banh, hainduj le bi 2017 ciet "vangjdoxlienz + makgaivaiz Baksak" baenzdauq hozdung, doenggvaq vangjdoxlienz + ciet makgaivaiz, fatok giindei densangh bingzdaiz, haenqrengz guh ndei hong senhconz doigvangq caeuq youq gwnz bingzdaiz densangh gai makgaivaiz Baksak.

(Yenj Yaujningz)

● Mboengqneix, aen hoih baij gai huq Guengsae Daizvanh(Vahlenz) bi 2017 youq Namzningz Bakuq haimuq. Baez hoih baij gai huq neix guh 3 ngoenz, yinx ndaiej Daizvanh Vahlenz Yen caeuq ca mbouj geijlai bak aen giyez bonjdieg daiq cien lai cungj huq daeuj camgya baij gai, siminz mbouj byaij ok Namzningz couh ndaiej cawx huq Daizvanh.

(Liu Siuli)